

Nd.

## 514. Frumvarp til laga

um heimild fyrir ríkisstjórnina til ráðstafana vegna útflutnings á afurðum báta-útvegsins.

Frá meiri hl. fjárhagsnefndar.

### 1. gr.

Vegna verðhækkunar þeirrar til bátaútvegsins á nýjum þorski og ýsu, sem ákveðin var með auglýsingu 5. janúar 1946, heimilast ríkisstjórninni að ábyrgjast hraðfrystihúsum landsins allt að 5 aura á innvegið kg miðað við slægðan fisk með haus. Ábyrgð þessi kemur til greina að fullu, ef söluverð á hraðfrystum þorsk- og ýsuflökum reynist jafnt eða lægra en söluverð þeirra 1945. Nú reynist söluverð hraðfrystra þorsk- og ýsuflaka haerra en á árinu 1945, en þó ekki sem svarar verðhækkuninni á nýja fiskinum, og skal þá meta, að hve miklu leyti ábyrgð ríkissjóðs kemur til greina.

### 2. gr.

Ríkisstjórninni er heimilt fyrir hönd ríkissjóðs að kaupa til útflutnings eða ábyrgjast sölu á allt að 5000 tonnum af saltfiski fyrir bátaútveginn, er miðist við kr. 1.70 hvert kilógramm af fullsöltuðum og fullstöðnum stórfiski (þorski) I. flokks.

### 3. gr.

Atvinnumálaráðherra getur sett fyrirmæli um allt, er lýtur að framkvæmd þeirra ráðstafana, er um getur í 1. og 2. gr.

### 4. gr.

Lög þessi öðlast þegar gildi.

## Greinargerð.

Frumvarpið er flutt eftir beiðni atvinnumálaráðherra og hafa einstakir nefnd-armenn óbundið atkvæði um málið. Frv. fylgdi svoltandi greinargerð:

Um síðastliðin áramót voru horfur á afkomu bátaútvegsins þannig, að vafasamt var, að útvegsmenn fengju sjómenn á bátana og treystust til að gera út báta sína með óbreyttu verði á fiskaflanum. Til þess að forða vandræðum var, að tilhlutun ríkisstjórnarinnar, hækkað lágmarksverð á nýjum þorski og ýsu. Jafnframt þurfti að tryggja sölu á fiskinum fyrir hið hækkaða lágmarksverð. Á þessum tíma var ósamið um sölu á hraðfrysta fiskinum. Til þess að öruggt yrði, að hraðfrystihúsin hæfu rekstur, bar nauðsyn til að tryggja þau fyrir tapi, sem kynni að leiða af hækkun lágmarksverðsins. Enn fremur þurfti, þar sem útlit var fyrir, að skortur yrði á nægilega miklu skiprúmi til útflutnings á nýjum fiski, að tryggja útvegsmenn og sjómenn fyrir hugsanlegu tjóni af því að salta hluta aflans.

Með skírskotun til þess, sem að framan segir, er frumvarp þetta borð fram, til þess að ríkisstjórninni veitist lagaheimild til að takast á hendur fyrir hönd ríkissjóðs þær skuldbindingar, sem í frumvarpinu greinir.